

四庫全書

子部

欽定四庫全書

子部
經濟類編卷八十九

詳校官中書臣瞿 照

主事臣 祁韻士覆勘

總校官知縣臣 繆 琪

校對官編修臣 錢 樾

謄錄監生臣 孟 照

欽定四庫全書

經濟類編卷八十九

人事類一

言行

馮琦馮瑗 撰

孔子之周觀於太廟右陛之前有金人焉三緘其口而
銘其背曰古之慎言人也戒之哉戒之哉無多言多言
多敗無多事多事多患安樂必戒無行所悔勿謂何傷

其禍將長勿謂何害其禍將大勿謂何殘其禍將然勿謂莫聞天妖伺人熒熒不滅炎炎奈何涓涓不壅將成江河縣縣不絕將成網羅青青不伐將尋斧柯誠不能慎之禍之根也曰是何傷禍之門也強梁者不得其死好勝者必遇其敵盜怨主人民害其貴君子知天下之不可蓋也故後之下之使人慕之執雌持下莫能與之爭者人皆趨彼我獨守此衆人惑惑我獨不從內藏我知不與人論技我雖尊高人莫害我夫江河長百谷者

以其卑下也天道無親常與善人戒之哉戒之哉孔子
顧謂弟子曰記之此言雖鄙而中事情詩曰戰戰兢兢
如臨深淵如履薄冰行身如此豈以口遇禍哉

孔蔑問行己之道子曰知而弗為莫如弗知親而弗信
莫如弗親樂之方至樂而弗驕患之所至思而弗憂孔
蔑曰行己乎子曰攻其所不能備其所不足毋以其所
不能疑人毋以其所能驕人終日言無遺己之憂終日
行不遺己之患惟智者能之

陳靈公行僻而言失泄治曰陳其亡矣吾驟諫君君不
吾聽而愈失威儀夫上之化下猶風靡草東風則草靡
而西西風則草靡而東在風所由而草為之靡是故人
君之動不可不慎也夫樹曲木者惡得直景人君不直
其行不敬其言者未有能保帝王之號垂顯令之名者
也易曰夫君子居其室出其言善則千里之外應之况
其過者乎居其室出其言不善則千里之外違之况其
過者乎言出於身加於民行發乎過見乎遠言行君子

之樞機樞機之發榮辱之主君子之所以動天地可不慎乎天地動而萬物變化詩曰慎爾出話敬爾威儀無不柔嘉此之謂也今君不是之慎而縱恣焉不亡必弑靈公聞之以泄冶為妖言而殺之後果弑於徵舒

徐彥伯樞機論 書曰惟口起羞惟甲冑起戎又云齊

乃位度乃口易曰慎言語節飲食又云出其言善千里應之出其言不善千里違之禮亦云可言也不可行情也君子不言也可行也不可言也君子不行也嗚呼先聖

知言之為大也知言之為急也精微以勸之典謨以告之禮經以防之守名教者何可不循其誥訓而服其糟粕乎故曰言語者君子之樞機也動則物應物應則得失之兆見也得之者江海比隣失之者肝膽楚越然後知否泰榮辱係于言乎夫言者德之柄也行之主也心之志也身之文也既可以濟身亦可以覆身故中庸鑲其心右階銘其背南容三復于白圭殷子九疇于洪範良有以也是以倚撫瑕玷詳黜躁競審無恒以階亂將

不密以致危利生于口森然覆邦之說道不由衷變彼如簧
之刺可不懼之哉其有識暗邪正思慮微形破金湯之箭伐
禍亂之根用咕躡為雄辯以號呶為令德至若梧官問荅荆
齊所以奔命韓魏加肘知伯所以危殘蔡侯繩息媯也亟招
甲兵之罰鄭曼圍宋卿也而受鼎鑊之誅史遷輕議終下蠶
室張紘詭說更齒龍淵凡此過言其流匪一或穢猶糞土或
動成刀劍或苟且其心或脂膏其體挾邪作蠱守之而不懈
往輒破的去之而彌遠亦何異寒臯聚音尤也羣吠得死為

幸何修名之立乎雖復伯玉沮顏追謝于元凱蔣濟貽恨失譽于王陵犀首沒齒于季章曹瞞齞舌于劉主當何及哉孔子曰予欲無言又云終身為善一言敗之惜也老子亦云多言數窮又云聰明深察而近于死者議人者也何聖人深思偉慮杜漸防萌之至乎夫不可言而言者曰狂可言而不言者曰隱鉗舌拱默曷通彼此之懷囊括而處孰啟謨明之訓則上言者下聽也下言者上用也睿詰之言猶天地也人覆燾而生焉大雅之言猶鐘鼓也人考擊而樂焉作以龜鏡周公之言也出為金石孔

子之言也存其家邦國僑之言也立而不朽臧生之言也是謂
德音請我宗極滿于天下貽厥後昆殷宗甘之於酒醴孫卿喻
之以琴瑟闕里重于四時郢都輕其千乘豈不韙哉豈不休哉
但懋績遠大克念丕訓審思而應精慮而動謀其心以後發定
其交以後談不趨趨于非黨不屏營于詭遇非先王之至德不
敢行非先王之法言不敢道翦其纍纍之緒撲其炎炎之勢自
然介爾景福保茲終吉則悔吝何由而生哉孔子曰終日行不遺
已患終日言不遺已憂如此乃可以言也戒之哉戒之哉

君子四則

子路持劍孔子問曰由安用此乎子路曰善古者固以善之不善古者固以自衛孔子曰君子以忠為質以仁為衛不出環堵之內而聞千里之外不善以忠化寇暴以仁圍何必持劍乎子路曰由也請攝齊以事先生矣南瑕子過程太子太子為烹鯁魚南瑕子曰吾聞君子不食鯁魚程太子曰乃君子否子何事焉南瑕子曰吾聞君子上比所以廣德也下比所以狹行也於惡自還

之原也詩云高山仰止景行行止吾豈敢自以為君子哉志向之而已孔子曰見賢思齊焉見不賢而內自省楚王問莊辛曰君子之行奈何莊辛對曰居不為垣牆人莫能毀傷行不從周衛人莫能暴害此君子之行也楚王復問君子之富奈何對曰君子之富假貸人不德也不責也其飲食人不使也不役也親戚愛之衆人喜之不肖者事之皆欲其壽樂而不傷于患此君子之富也王曰善

墨子修身篇 君子戰雖有陳而勇為本焉喪雖有禮而哀為本焉士雖有學而行為本焉是故置本不安者無務豐末近者不親無務來遠親戚不附無務外交事無始終無務多業舉物而闇無務博聞是故先王之治天下也必察邇來遠君子察邇而邇修者也見不修行見毀而反之身者也此以怨省而行修矣譖慝之言無入之耳批扞之聲無出之口殺傷人之孩無存之心雖有詆訐之民無所依矣故君子力

事日彊願欲日逾設壯日盛君子之道也貧則見廉
富則見義生則見愛死則見哀四行者不可虛假反
之身者也藏於心者無以竭愛動於身者無以竭恭
出於口者無以竭馴暢之四交接之肌膚華髮隨巔
而猶弗舍者其唯聖人乎志不彊者智不達言不信
者行不果據財不能以分人者不足與友守道不篤
徧物不博辯是非不察者不足與遊本不固者未必
幾雄而不修者其後必情原濁者流不清行不信者

名必耗名不徒生而譽不自長功成名遂名譽不可
虛假反之身者也務言而緩行雖辯必不聽多力而
伐功雖勞必不圖慧者心辯而不繁說多力而不伐
功此以名譽揚天下言無務為多而務為智無務為
文而務為察故以彼智無察在身而情反其路者也
善無主於心者不留行莫辯於身者不立名不可簡
而成也譽不可巧而立也君子以身戴行者也思利
尋馬忘名忽馬可以為士於天下者未嘗有也

仁 二則

季康子謂子游曰仁者愛人乎子游曰然人亦愛之乎
子游曰然康子曰鄭子產死鄭人丈夫捨玦珮婦人捨
珠珥夫婦巷哭三月不聞箏瑟之聲仲尼之死吾不聞
魯國之愛夫子奚也子游曰譬子產之與夫子其猶浸
水之與天雨乎浸水所及則生不及則死斯民之生也
必以時雨既以生莫愛其賜故曰譬子產之與夫子也
猶浸水之與天雨乎

董仲舒三仁對 臣聞昔者魯君問柳下惠吾欲伐齊
何如柳下惠曰不可歸而有憂色曰吾聞伐國不問仁
人此言何為至於我哉徒見問耳且猶羞之况設詐以
伐吳乎由此言之粵本無一仁夫仁人者正其誼不謀
其利明其道不計其功是以仲尼之門五尺之童羞稱
五伯為其先詐力而後仁誼也苟為詐而已故不足稱
於大君子之門也五伯比於他諸侯為賢其比三王猶
碣硤之與美玉也王曰善

義 二則

墨子貴義篇 子墨子曰萬事莫貴於義今謂人曰子
子冠履而斷子之手足子為之乎必不為何故則冠履
不若手足之貴也又曰子子天下而殺子之身子子為之
乎必不為何故則天下不若身之貴也爭一言以相殺
是貴義於其身也故曰萬事莫貴於義也子墨子自魯
齊即過故人謂子墨子曰今天下莫為義子獨自苦而
為義子不若己子墨子曰今有人於此有子十人一人

耕而九人處則耕者不可以不益急矣何故則食者衆而耕者寡矣今天下莫為義則子如勸我者也何故止我子墨子南游於楚獻惠王獻惠王以老辭使穆賀見子墨子子墨子說穆賀穆賀大說謂子墨子曰子之言則誠善矣而君王天下之大王也毋乃曰賤人之所為而不用乎子墨子曰唯其可行譬若藥然草之本天子食之以順其疾豈曰一草之本而不食哉今農夫入其稅於大人大人為酒醴染盛以祭上帝鬼神豈曰賤人

之所為而不享哉故雖賤人也上比之農下比之藥曾
不若一草之木乎且主君亦嘗聞湯之說乎昔者湯將
往見伊尹令彭氏之子御彭氏之子半道而問曰君將
何之湯曰將往見伊尹彭氏之子曰伊尹天下之賤人
也君若欲見之亦令名問焉彼受賜矣湯曰非女所知
也今有藥此食之則耳加聰目加明則吾必說而強食
之今夫伊尹之於我國也譬之良醫善藥也而子不欲
我見伊尹是子不欲吾善也因下彭氏之子不使御彼

苟然然後可也子墨子曰凡言凡動利於天鬼百姓者
為之凡言凡動害於天鬼百姓者舍之凡言凡動合於
三代聖王堯舜禹湯文武者為之凡言凡動合於三代
暴王桀紂幽厲者舍之子墨子曰言足以遷行者常之
不足以遷行者勿常以遷行而常之是蕩口也子墨子
曰必去六辟嘿則思言則誨動則事使者三代御必為
聖人必去喜去怒去樂去悲去愛而用仁義手足口鼻
耳從事於義必為聖人子墨子謂二三子曰為義而不

能必無排其道譬若匠人之斲而不能無排其繩子墨
子曰世之君子使之為一莛之宰不能則辭之使為一
國之相不能而為之豈不悖哉子墨子曰今賢曰鉅者
白也黔者墨也雖明目者無以易之兼白墨使瞽取焉
不能知也故我曰瞽不知白墨者非以其名也以其取
也今天下之君子之名仁也雖禹湯無以易之兼仁與
不仁而使天下之君子取焉不能知也故我曰天下之
君子不知仁者非以其名也亦以其取也子墨子曰今

士之用身不若商人之用一布之慎也商人用一布布不敢繼苟而讐焉必擇良者今士之用身則不然意之所欲則為之厚者入刑罰薄者被毀醜則士之用身不若商人之用一布之慎也子墨子曰世之君子欲其義之成而助之修其身則慍是猶欲其牆之成而人助之築則慍也豈不悖哉子墨子曰古之聖王欲傳其道於後世是故書之竹帛鏤之金石傳遺後世子孫欲後世子孫法之也今聞先王之遺而不為是廢先王之傳也

子墨子南遊使衛開中載書甚多弦唐子見而怪之曰
吾夫子教公尚過曰揣曲直而已今夫子載書甚多何
有也子墨子曰昔者周公旦朝讀書百篇夕見七十士
故周公旦佐相天子其修至於今翟上無君上之事下
無耕農之難吾安敢廢此翟聞之同歸之物信有誤者
然而民聽不鈞是以書多也今若過之心者數逆於精
微同歸之物既已知其要矣是以不教以書也而子何
怪焉子墨子謂公良桓子曰衛小國也處於齊晉之間

猶貧家之處於富家之間也貧家而學富家之衣食多用則速亡必矣今簡子之家飾車數百乘馬食菽粟者數百匹婦人衣文繡者數百人吾取飾車食馬之費與繡衣之財以畜士必千人有餘若有患難則使百人處於前數百於後與婦人數百人處前後孰安吾以為不若畜士之安也子墨子仕於衛所仕者至而反子墨子曰何故反對曰與我言而不當曰待女以千盆授我五百盆故去之也子墨子曰授子過千盆則子去之乎對

曰不去子墨子曰然則非為其不審也為其寡也子墨
子曰世俗之君子視義士不若負粟者今有人於此負
粟息於路側欲起而不能君子見之無長少貴賤必起
之何故也曰義也今為義也君子奉承先王之道以語
之縱不說而行又從而非毀之則是世俗之君子也不
若視負粟者矣子墨子曰商人之四方市賈信徒雖有
關梁之難盜賊之危必為之今士坐而言義無關梁之
難盜賊之危此為信徒不可勝計然而不為則士之計

利不若商人之察也子墨子北之齊遇日者日者曰帝以今日殺黑龍於北方而先生之色黑不可以北子墨子不聽遂北而反為日者曰我謂先生不可以北子墨子曰南之人不得北北之人不得南其色有黑者有白者何故皆不遂也且帝以甲乙殺青龍於東方以丙丁殺赤龍於南方以庚辛殺白龍於西方以壬癸殺黑龍於北方若用子之言則是禁下行者也是圍心而虛天下也子之言不可用也子墨子曰吾言足用矣舍言革

思者是猶舍獲而據粟也以其言非吾言者是猶以卵投石也盡天下之卵其石猶是也不可毀也

趙之中牟叛趙襄子率師伐之圍未合而城自壞者十堵襄子擊金而退士軍吏曰君誅中牟之罪而城自壞是天助也君曷為去之襄子曰吾聞之於叔向曰君子不乘人於利不迫人於險使之城而後攻中牟聞其義乃請降詩曰王猶允塞徐方既來此之謂也襄子遂滅智氏并代為天下彊本由伐中牟也

守禮 二則

齊桓公北伐山戎氏其道過燕燕君逆而出境桓公問管仲曰諸侯相逆固出境乎管仲曰非天子不出境桓公曰然則燕君畏而失禮也寡人不道而使燕君失禮乃割燕君所至之地以與燕君諸侯聞之皆朝於齊會于葵丘尋盟且修好禮也襄王使宰孔賜齊侯胙曰天子有事于文武使孔賜伯舅胙齊侯將下拜孔曰且有後命天子使孔曰以伯舅耄老加勞賜一級無下拜

對曰天威不遠顏咫尺小白余敢貪天子之命無下拜
恐隕越于下以遺天子羞敢不下拜下拜登受

知 一則

道吾問之夫子多所知無所知其身孰善乎對曰無知
者死人屬也雖不死累人者必衆甚矣然多所知者好
其用心也多所知者出于利人即善矣出于害人即不
善也道吾曰善哉

信 八則

呂覽貴信篇 凡人主必信信而又信誰人不親故周
書曰允哉允哉以言非信則百事不滿也故信之為功
大矣信立則虛言可以賞矣虛言可以賞則六合之內
皆為己府矣信之所及盡制之矣制之而不用人之有
也制之而用之己之有也已有之則天地之物畢為用
矣人主有見此論者其王不久矣人臣有知此論者可
以為王者佐矣天行不信不能成歲地行不信草木不
大春之德風風不信其華不盛華不盛則果實不生夏

之德暑暑不信其土不肥土不肥則長遂不精秋之德
雨雨不信其穀不堅穀不堅則五種不成冬之德寒寒
不信其地不剛地不剛則凍閉不開天地之大四時之
化而猶不能以不信成物又况乎人事君臣不信則百
姓誹謗社稷不寧處官不信則少不畏長貴賤相輕賞
罰不信則民易犯法不可使令交友不信則離散鬱怨
不能相親百工不信則器械苦偽丹漆染色不貞夫可
與為始可與為終可與尊通可與卑窮者其唯信乎信

而又信重襲於身乃通於天以此治人則膏雨甘露降矣寒暑四時當矣齊桓公伐魯魯人不敢輕戰去魯國五十里而封之魯請比關內侯以聽桓公許之曹翹謂魯莊公曰君寧死而又死乎其寧生而又生乎莊公曰何謂也曹翹曰聽臣之言國必廣大身必安樂是生而又生也不聽臣之言國必滅亡身必危辱是死而又死也莊公曰請從於是明日將盟莊公與曹翹皆懷劍至於壇上莊公左搏桓公右抽劍以自承曰魯國去境數

百里今去境五十里亦無生矣鈞其死也戮於君前管仲鮑叔進曹翽按劔當兩陞之間曰且二君將改圖毋或進者莊公曰封於汶則可不則請死管仲曰以地衛君非以君衛地君其許之乃遂封於汶南與之盟歸而欲勿予管仲曰不可人特劫君而不盟君不知不可謂智臨難而不能勿聽不可謂勇許之而不予不可謂信不智不勇不信有此三者不可以立功名予之雖亡地亦得信以四百里之地見信於天下君猶得也莊公仇也

曹翹賊也信於仇賊又况於非仇賊者乎夫九合之而合一匡之而聽從此生矣管仲可謂能因物矣以辱為榮以窮為通雖失乎前可謂後得之矣物固不可全也鄭武公莊公為平王卿士王貳于虢鄭伯怨王王曰無之故周鄭交質王子狐為質于鄭鄭公子忽為質於周王崩周人將畀虢公政四月鄭祭足帥師取溫之麥秋又取成周之禾周鄭交惡君子曰信不由中質無益也明恕而行要之以禮雖無有質誰能間之苟有明信澗

谿沼吐之毛蘋蘩蕓藻之菜筐筥錡釜之器潢汙
行潦之水可薦於鬼神可羞於王公而况君子結
二國之信行之以禮又焉用質風有采蘩采蘋雅
有行葦洞酌昭忠信也

晉文公攻原襄十日糧遂與大夫期十日至原十
日而原不下擊金而退罷兵而去士有從原中出
者曰原三日即下矣羣臣左右諫曰夫原之食竭
力盡矣君姑待之公曰吾與士期十日不去是亡

吾信也得原失信吾不為也遂罷兵而去原人聞
曰有君如彼其信也可無歸乎乃降公衛人聞曰
有君如彼其信也可無從乎乃降公孔子聞而記
之曰攻原得衛者信也

晉侯使韓穿來言汶陽之田歸之于齊季文子餞
之私焉曰大國制義以為盟主是以諸侯懷德畏
討無有貳心謂汶陽之田敝邑之舊也而用師於
齊使歸諸敝邑今有二命曰歸諸齊信以行義

以成命小國所望而懷也信不可知義無所立四方諸侯其誰不解體詩曰女也不爽士貳其行士也罔極二三其德七年之中一與一奪二三孰甚焉士之二三猶喪妃耦而况霸主霸主將德是以而二三之其何以長有諸侯乎詩曰猶之未遠是用大簡行父懼晉之不遠猶而失諸侯也是以敢私言之

齊攻魯求岑鼎魯君載岑鼎往齊侯不信而反之

以為非也使人告魯君柳下惠以為是因請受之請魯君請于柳下惠柳下惠對曰君之欲以為岑鼎也以免國也臣亦有國于此破臣之國以免君之國此臣所難也魯君乃以真岑鼎往柳下惠可謂守信矣非獨存己之國也又存魯君之國信之於人重矣猶輿之輓軌也故孔子曰大車無輓小車無軌其何以行之哉此之謂也

曾子之妻之市其子隨之而泣其母曰女還顧反

為女殺彘適市來曾子欲捕彘殺之妻止之曰特
與嬰兒戲耳曾子曰嬰兒非與戲也嬰兒非有知
也待父母而學者也聽父母之教令子欺之是教
子欺也父欺子而不信其母非以成教也遂烹彘
李悝與秦人戰謂左和曰速上右和已上矣又馳
而至右和曰左和已上矣左右和曰上矣於是皆
爭上其明年與秦人戰秦人襲之至幾奪其軍此
不信之患

吳起治西河欲諭其信於民夜日置表於南門之外令於邑中曰明日有人僨南門之外表者仕長大夫明日日晏矣莫有僨表者民相謂曰此必不信有一人曰試往僨表不得賞而已何傷往僨表來謁吳起吳起自見而出仕之長大夫夜日又復立表又令於邑中如前邑人守門爭表表加植不得所賞自是之後民信吳起之賞罰賞罰信乎民何事而不成豈獨兵乎

儉 十九則

周公曰冬日之閉凍也不固則春夏之長草木也不茂
天地不能常侈常費而况於人乎故萬物必有盛衰萬
事必有弛張國家必有文武官治必有賞罰是以智士
儉用其材則家富聖人愛寶其神則精盛人君重戰其
卒則民衆民衆則國廣是以舉之曰儉故能廣

魯有儉者瓦鬲煮食食之而美盛之土銅之器以進孔
子孔子受之歡然而悅如受大牢之饋弟子曰瓦甌陋

器也煮食薄膳也而先生何喜如此乎孔子曰吾聞好諫者思其君食美者念其親吾非以饌為厚也以其食美而思我親也

孔子曰中人之情有餘則侈不足則儉無禁則淫無度則失縱欲則敗飲食有量衣服有節宮室有度畜聚有數車器有限以防亂之原也故夫度量不可不明也善欲不可不聽也

孟獻伯相魯堂下生藿藜門外長荆棘食不二味坐不

重席無衣帛之妾居不粟馬出不從車叔向聞之以告
苗賁皇賁皇非之曰是出主之爵祿以附下也孟獻伯
拜上卿叔向往賀門有御馬不食禾向曰子無二馬二
輿何也獻伯曰吾觀國人尚有饑色是以不秣馬斑白
者多以徒行故不二輿向曰吾始賀子之拜卿今賀子
之儉也向出語苗賁皇曰助吾賀獻伯之儉也苗子曰
何賀焉夫爵祿旗車所以異功伐別賢不肖也故晉國
之法上大夫二輿二乘中大夫二輿一乘下大夫專乘

此明等級也且夫卿必有軍事是故循車馬比卒乘以備戎事有難則以備不虞平夷則以給朝事今亂晉國之政之不虞之備以成節儉以潔私名獻伯之儉也可與又何賀

齊景公飲酒陳桓子侍望見晏子而復于公曰請浮晏子公曰何故也對曰晏子衣緇布之衣麋鹿之裘棧軫之車而駕騶馬以朝是隱君之賜也公曰諾酌者奉觴而進之曰君命浮子晏子曰何故也陳桓子曰君賜之

卿位以尊其身寵之百萬以富其家羣臣之爵莫尊于子祿莫厚于子今子衣緇布之衣麋鹿之裘棧軫之車而駕駕馬以朝則是隱君之賜也故浮子晏子避席曰請飲而後辭乎其辭而後飲乎公曰辭然後飲晏子曰君賜卿位以顯其身嬰不敢為顯受也為行君令也寵之百萬以富其家嬰不敢為富受也為通君賜也臣聞古之賢臣有受厚賜而不顧其國族則過之臨事守職不勝其任則過之君之內隸臣之父兄若有離散在於

野鄙者此臣之罪也君之外隸臣之所職若有播亡在四方者此臣之罪也兵革不完戰車不修此臣之罪也若夫弊車駑馬以朝主者非臣之罪也且臣以君之賜臣父之黨無不乘車者母之黨無不足于衣食者妻之黨無凍餒者國之簡士待臣而後舉火者數百家如此為隱君之賜乎彰君之賜乎公曰善為我浮桓子也

晏子方食君之使者至分食而食之晏子不飽使者返言之景公景公曰嘻夫子之家若是其貧也寡人不知

也是寡人之過也令吏致千家之縣一於晏子晏子再拜而辭曰嬰之家不貧以君之賜澤覆三族延及交遊以振百姓君之賜也厚矣嬰之家不貧也嬰聞之厚取之君而厚施之人代君為君也忠臣不為也厚取之君而藏之是筐篋存也仁人不為也厚取之君而無所施之身死而財遷智者不為也嬰也聞為人臣進不事上以為忠退不克下以為廉八升之布一豆之食足矣使者三返遂辭不受也

晏子朝乘敝車駕駑馬景公見之曰嘻夫子之祿寡耶
何乘不任之甚也晏子對曰賴君之賜得以壽三族及
國交遊皆得生焉臣得煖衣飽食弊車駑馬以奉其身
於臣足矣晏子出公使梁丘據遺之輅車乘馬三返不
受公不悅趣召晏子晏子至公曰夫子不受寡人亦不
乘晏子對曰君使臣臨百官之吏節其衣服飲食之養
以先齊國之人然猶恐其侈靡而不顧其行也今輅車
乘馬君乘之上臣亦乘之下民之無義侈其衣食而不

顧其行者臣無以禁之遂讓不受也

趙簡子乘樊車腴馬衣羖羊裘其宰進諫曰車新則安馬肥則往來疾狐白之裘溫且輕簡子曰吾非不知也吾聞之君子服善則益恭細人服善則益倨我以自備恐有細人之心也傳曰周公位尊愈卑勝敵愈懼家富愈儉故周氏八百餘年此之謂也

簡主謂左右車席泰美夫冠雖賤頭必戴之屨雖貴足必履之今車席如此太美吾將何屨以履之夫美下而

耗上妨義之本也

衛叔孫文子問于王孫夏曰吾先君之廟小吾欲更之可乎對曰古之君子以儉為禮今之君子以汰易之夫衛國雖貧豈無文履一竒以易十稷之繡哉以為非禮也文子乃止

墨子節用篇 古者明王聖人所以王天下正諸侯者彼其愛民謹忠利民謹厚忠信相連又示之以利是以終身不饜歿二十而不卷古者明王聖人其所以王天

下正諸侯者此也是故古者聖王制為節用之法曰凡天下羣百工輪車轡匏陶冶梓匠使各從事其所能曰凡足以奉給民用諸加費不加民利則止古者聖王制為飲食之法曰足以充虛繼氣強股肱耳目聰明則止不極五味之調芬香之和致遠國珍恢異物何以知其然古者堯治天下南撫交趾北降幽都東西至日所出入莫不賓服建至其厚愛黍稷不二羹臠不重飲於土埴噉於土鋤斗以酌俛仰周旋威儀之禮聖王弗為

古者聖王制為衣服之法曰冬服紺緹之衣輕且暖夏服絺綌之衣輕且清則止諸加費不加於民利者聖王弗為古者聖王為猛禽狡獸暴人害民於是教民以兵行日帶劔為刺則入擊則斷旁擊而不拆此劔之利也甲為衣則輕且利動則兵且從此甲之利也車為服重致遠乘之則安引之則利安以不傷人利以速至此車之利也古者聖王為大川廣谷之不可濟於是利為舟楫足以將之則止雖止者三公諸侯至舟楫不易津人

不飾此舟之利也古者聖王制為節葬之法曰衣三領
足以朽肉棺三寸足以朽骸堀穴深不通於泉流不發
洩則止死者既葬生者毋久喪用哀古者人之始生未
有宮室之時因陵邱掘穴而處焉聖王慮之以為堀穴
曰冬可以辟風寒建夏下潤濕上重烝恐傷民之氣於
是作為宮室而利然則為宮室之法將奈何哉子墨子
曰其旁可以圍風寒上可以圍雪霜雨露其中蠲潔
可以祭祀宮牆足以為男女之別則止諸加費不加民

利者聖王弗為

漢元帝初即位徵張禹為諫大夫數虛已問以政事是時年歲不登郡國多困禹奏言古者宮室有制宮女不過九人秣馬不過八匹牆塗而不瑤木摩而不刻車輿器物皆不文畫苑囿不過數十里與民共之任賢使能什一而稅亡它賦斂繇戍之役使民歲不過三日千里之內自給千里之外各置貢職而已故天下家給人足頌聲並作至高祖孝文孝景皇帝循古節儉宮女不過

十餘廐馬百餘匹孝文皇帝衣絺履革器亡瑀文金銀
之飾後世爭為奢侈轉益甚臣下亦相放效衣服履
綉刀劔亂於主上主上時臨朝入廟衆人不能別異甚
非其宜然非自知奢僭也猶魯昭公曰吾何僭矣今大
夫僭諸侯諸侯僭天子天子過天道其日久矣承哀救亂矯
復古化在於陛下臣愚以為盡如太古難宜少放古以
自節焉論語曰君子樂節禮樂方今宮室已定亡可奈
何矣其餘盡可減損故時齊三服官輸物不過十笥方

今齊三服官作工各數千人一歲費數鉅萬蜀廣漢主金銀器歲各用五百萬三宮官官費五十萬東西織室亦然廐馬食粟將萬匹臣禹嘗從之東宮見賜杯案盡文畫金銀飾非當所以賜食臣下也東宮之費亦不可勝計天下之民所為大饑餓死者是也今民大饑而死又不葬為犬豬所食人至相食而廐馬食粟苦其大肥氣盛怒至乃日步作之王者受命於天為民父母固當若此乎天不見耶武帝時又多取好女至數千人以

填後宮及棄天下昭帝幼弱霍光專事不知禮正妾多
臧金錢財物鳥獸魚鼈牛馬虎豹生禽凡百九十物盡
瘞藏之又皆以後宮女置於園陵大失禮逆天心又未
必稱武帝意也昭帝晏駕光復行之至孝宣皇帝時陛
下惡有所言羣臣亦隨故事甚可痛也故使天下承化
取女皆大過度諸侯妻妾或至數百人豪富吏民畜歌
者至數十人是以內多怨女外多曠夫及衆庶葬埋皆
虛地上以實地下其過自上生皆在大臣循故事之臯

也唯陛下深察古道從其儉者大減損乘輿服御器物
三分去二子產多少有命審察後宮擇其賢者留二十
人餘悉歸之及諸陵園女亡子者宜悉遣獨杜陵宮人
數百誠可哀憐也廐馬可亡過數十匹獨舍長安城南
苑地以為田獵之圃自城西南至山西至鄠皆復其田
以與貧民方今天下饑饉可亡大自損減以救之稱天
意乎天生聖人蓋為萬民非獨使自娛樂而已也故詩
曰天難諶斯不易惟王上帝臨女毋貳爾心當仁不讓

獨可以聖心參諸天地揆之往古不可與臣下議也若其阿意順指隨君上下臣禹不勝拳拳不敢不盡愚心光武時王良為大司徒司直在位恭儉妻子不入官舍布被瓦器時司徒史鮑恢以事到東海過候其家而良妻布裙曳柴從田中歸恢告曰我司徒史也故來受書欲見夫人妻曰妾是也苦掾無書恢乃下拜嘆息而還後漢書論曰夫利仁者或借仁以從利體義者不期體以合義季文子妾不衣帛魯人以為美談公孫弘身服

布被汲黯譏其多詐事實未殊而譽毀別議何也將體之與利異乎宣秉王良處位優重而秉甘疏薄良妻荷薪可謂行過乎儉然當世咨其清人君高其節豈非臨之以誠哉語曰同言而信則信在言前同令而行則誠在令外不其然乎

郡中豪族多以奢靡相尚梁節王暢常布衣皮褥車馬羸敗以矯其敝同郡劉表時年十七從暢受學進諫曰夫奢不僭上儉不逼下循道行禮貴處可否之間蓬伯

玉取獨為君子府君不希孔聖之明訓而慕夷齊之末
操無乃皎然自貴於世乎暢曰昔公儀休在魯拔園葵
去織婦孫叔敖相楚其子被裘刈薪夫以約失之鮮矣
聞伯夷之風者貪夫廉懦夫有立志雖以不德敢慕遺

烈

晉陸納以吏部郎出為吳興太守將之郡先至姑孰辭
桓溫因問溫曰公致醉可飲幾酒食肉多少溫曰年大
來飲三升便醉白肉不過十臠卿復云何納曰素不能

飲止可二升肉亦不足言後伺溫閒謂之曰外有微禮
方守遠郡欲與公一醉以展下情溫欣然納之時王坦
之刁彝在坐及受禮唯酒一斗鹿肉一椀坐客愕然納
徐曰明公近云飲酒三升納止可二升今有一斗以備
杯杓餘滲溫及賓客並嘆其率素更勅中廚設精饌酣
飲極歡而罷納至郡不受俸祿頃之徵拜左氏尚書領
州大中正將應召外白宜裝幾船納曰私奴裝糧食來
無所復須也臨發止有被襪而已其餘並封以還官遷

太常徙吏部尚書加奉車都尉衛將軍謝安常欲詣納而納殊無供辦其兄子俶不敢問之乃密為之具安既至納所設唯茶果而已俶遂陳盛饌珍羞畢具客罷納大怒曰汝不能光益父叔乃復穢我素業耶於是杖之

四十

殷仲堪在荊州連年水旱百姓饑饉仲堪食常五碗盤無餘肴飯粘落席間輒拾以噉之雖欲率物亦緣其性真素也每語子弟云人物見我受任方州謂我豁平昔

時意今吾處之不易貧者士之常焉得登枝而捐其本爾其存之

周主悉出漢宮中寶玉器碎之於庭曰凡為帝王安用此物聞漢隱帝日與嬖寵於禁中嬉戲珍玩不離側茲事不遠宜以為鑒仍戒左右自今珍華悅目之物毋得入宮

湖南大饑周行逢開倉以賑之全活甚衆行逢起于微賤知民間疾苦勵精為治嚴而無私辟署僚屬皆取廉

介之士約束簡安吏民便之其自奉甚薄或譏其太儉
行逢曰馬氏父子窮奢極靡不恤百姓今子孫乞食于
人又足效乎

宋司馬光訓儉 吾本寒家世以清白相承吾性不喜
華靡自為乳兒長者加以金銀華美之服輒羞棄去之
二十忝科名聞喜宴獨不戴花同年曰君賜不可違也
乃簪一花平生衣取蔽寒食取充腹亦不敢服垢弊以
矯俗干名但順吾性而已衆人皆以奢靡為榮吾心獨

以儉素為美人皆嗤吾固陋吾不以為病應之曰孔子稱與其不遜也寧固又曰以約失之者鮮矣又曰士志於道而恥惡衣惡食者未足與議也古人以儉為美德今人乃以儉相詬病嘻異哉近歲風俗猶為侈靡走卒類士服農夫躡絲履吾記天聖中先公為郡牧判官客至未嘗不置酒或三行五行多不過七行酒酤於市果止於梨栗棗柿之類肴止於脯醢菜羹器用瓦漆當時士大夫家皆然人不相非也會數而禮勤物薄而情厚

近日士大夫家酒非內法果肴非遠方珍異食非多品
器皿非滿按不敢會賓友常數月營聚然後敢發書苟
或不然人爭非之以為鄙吝故不隨俗靡者蓋鮮矣嗟
乎風俗頹弊如是居位者雖不能禁忍助之乎又聞昔
李文靖公為相治居第於封丘門內廳事前僅容旋馬
或言其太隘公笑曰居第當傳子孫此為宰相廳事誠
隘為太祝奉禮廳事已寬矣參政魯公為諫官真宗遣
使急召之得於酒家既入問其所來以實對上曰卿為

清望官奈何飲於酒肆對曰臣家貧客至無器皿肴果
故就酒家觴之上以無隱益重之張文節為相自奉養
如為河陽掌書記時所親或規之曰公今受俸不少而
自奉若此公雖自信清約外人頗有公孫布被之譏公
宜少從衆公歎曰吾今日之俸雖舉家錦衣玉食何患
不能顧人之常情由儉入奢易由奢入儉難吾今日之
奉豈能常存一旦異於今日家人習奢已久不能頓儉
必致失所豈若吾居位去位身存身亡常如一日乎嗚

呼大賢之深謀遠慮豈庸人所及哉御孫曰儉德之共也
侈惡之大也共同也言有德者皆由儉來也夫儉則寡欲
君子寡欲則不役於物可以直道而行小人寡欲則能謹
身節用遠罪豐家故曰儉德之共也侈則多欲君子多欲
則貪慕富貴枉道速禍小人多欲則多求妄用敗家喪身
是以居官必賄居鄉必盜故曰侈惡之大也昔正考父餽
粥以糊口孟僖子知其後必有達人季文子相三君妾不
衣帛馬不食粟君子以為忠公叔文子享衛靈公史鮪知

其及禍何曾日食萬錢至孫以驕溢傾家自古以來以儉立名以侈自敗者多矣不可徧數聊舉數人以訓汝汝非徒身當服行當以訓汝子孫使知前輩之風俗云

吳隱之為左衛將軍雖居清顯祿賜皆頒親族冬月無被嘗澣衣乃披絮勤苦同于貧庶廣州包帶山海珍異所出一篋之實可資數世然多瘴疫人情憚焉唯貧窶不能自立者求補長史故前後刺史皆多贖貨朝廷欲革嶺南之弊安帝以隱之為龍驤將軍廣州刺史假節

領平越中郎將未至州二十里地名石門有水曰貪泉
飲者懷無厭之欲隱之既至語其親人曰不見可欲使
心不亂越嶺喪清吾知之矣乃至泉所酌而飲之因賦
詩曰古人云此水一飲懷千金試使夷齊飲終當不易
心及在州清操愈厲常食不過菜及乾魚而已帷帳
器服皆付外庫時人頗謂其矯然亦始終不易帳下人
進魚每剔去骨存肉隱之覺其用意罰而黜焉

謝混尚晉陵公主混死詔公主與謝氏絕婚公主恚以

混家事委混從子弘微混仍世宰輔僮僕千人唯有二
女年數歲弘微為之紀理生業一錢尺帛有文簿九年
而宋高祖即位公主降號東鄉君聽還謝氏入門室宇
倉廩不異平日田疇墾闢有加於舊東鄉君歎曰僕射
平生重此子可謂知人僕射為不亡矣親舊見者為之
流涕是歲東鄉君卒公私咸謂貨財宜歸二女田宅僮
役應屬弘微弘微一無所取自以私祿葬東鄉君混女
夫殷獻好樗蒲聞弘微不取財物乃奪其妻妹及伯母

兩姑之分以還戲責內人皆化弘微之讓一無所爭或譏之曰
謝氏累世財產充殷君一朝戲責理之不允莫此為大卿視而
不言辟棄物江海以為廉耳設使立清名而令家內不足亦吾
所不取也弘微曰親戚爭財為鄙之甚令內人尚能無言豈可
導之使爭乎

唐德宗使人諭陸贄以卿清慎太過諸道饋遺一皆拒絕事情
不通如鞭靴之類受亦無傷贄上奏其略曰監臨受賄盈尺有
刑至於士吏之微尚當嚴禁矧居風化之首反可通行賄道一

開展轉滋甚鞭靴不已必及金玉目見可欲何能自窒於心已與交私何能中絕其意是以涓流不止谿壑成災矣又曰若有所受有所却則遇却者疑乎見拒而不通矣若俱辭而不受則咸知不受者乃其常理復何嫌阻之有乎

杜暹以監察御史覆屯磧西會安西副都護郭虔瓘與西突厥可汗阿史那獻鎮守使劉遐慶更相訟詔暹即按入突騎施帳究索左驗虜以金遺暹暹固辭左右曰君寄身異域不宜逆其情乃受之埋於墓下出境遺牒令取之虜大驚追之不及及安

西都護闕暹自給事中居母憂詔起為之

張嘉貞不營家產有勸其市田宅者曰吾貴為將相何憂寒餒
比見朝士廣占良田身沒之日適足為無賴子弟酒色之資吾
不取也

元張雄飛剛真廉慎始終一節世祖嘗召見便殿語之曰聞卿
貧甚賜白金二千五百兩鈔二千五百貫既出又加賜黃金五
十兩雄飛拜受封識藏於家及其罷政阿哈瑪特之黨遂詔追
奪之或有勸雄飛自辯者雄飛曰上以考臣廉故賜臣然臣未

嘗敢輕用而封識以俟者正慮今日耳又可自辯乎尋起為燕
南河北道宣慰使卒

小廉 一則附

魯國之法魯人有贖臣妾于諸侯者取金于府子貢贖人于諸
侯而還其金孔子聞之曰賜失之矣聖人之舉事也可以移風
易俗而教道可施于百姓非獨適其身之行也今魯國富者寡
而貧者衆贖而受金則不為不廉不受則後莫復贖自今以來
魯人不復贖矣孔子可謂通于化矣故老子曰見小曰明

謙十則

成王封周公周公辭不受乃封周公子伯禽於魯將辭去周公誡之曰去矣子其無以魯國驕士矣我文王之子也武王之弟也今王之叔父也又相天下吾於天下亦不輕矣然嘗一沐而三握髮一食而三吐哺猶恐失天下之士吾聞之曰德行廣大而守以恭者榮土地博裕而守以儉者安祿位尊盛而守以卑者貴人衆兵強而守以畏者勝聰明睿智而守以愚者益博聞多記而

守以淺者廣此六守者皆謙德也夫貴為天子富有四海不謙者先天下亡其身桀紂是也可不慎乎故易曰有一道大足以守天下中足以守國家小足以守其身謙之謂也夫天道毀滿而益謙地道變滿而流謙鬼神害滿而福謙人道惡滿而好謙是以衣成則缺衽宮成則缺隅屋成則加錯示不成者天道然也易曰謙亨君子有終吉詩曰湯降不遲聖敬日躋其戒之哉子其無以魯國驕士矣

孔子讀易至於損益喟然而歎子夏避席問曰夫子何歎
馬孔子曰夫自損者必有益自益者必有決之吾以是歎也
子夏曰然則學者不可以益乎子曰非道之謂也道彌益
而身彌損夫學者損其自多以虛受人故能成其滿博哉天
道而必變凡持滿而能久者未嘗有也昔堯居天下之位
猶允恭以持之克讓以接之是以千歲而益盛迄今而益
彰夏桀昆吾自滿而無極亢意而不節斬刈黎民如草芥
馬天下討之如誅匹夫是以千載而惡著迄今而不滅

孔子觀於魯桓公之廟有欹器焉問於守廟者曰此謂何器對曰此蓋為宥坐之器孔子曰吾聞宥坐之器虛則敬中則正滿則覆明君以為至誠故常置之於坐側顧謂弟子曰試注水焉乃注之水中則正滿則覆夫子喟然嘆曰嗚呼夫物烏有滿而不覆者哉子路進曰敢問持滿有道乎子曰聰明睿守之以愚功被天下守之以讓勇力振世守之以怯富有四海守之以謙此之謂損之又損之道也

孔子曰終日言不遺己之憂終日行不遺己之患唯智者有之故恐懼所以除患也恭敬所以越難也終身為之一言敗之可不慎乎

子貢問孔子曰賜為人下而未知所以為人下之道也孔子曰為人下者其猶土乎種之則五穀生焉掘之則甘泉出焉草木植焉禽獸育焉生人立焉死人入焉多其功而不言為人下者其猶土乎

子路盛服而見孔子孔子曰由是襜褕者何也昔者江

水出于岷山其始也大足以濫觴及至江之津也不方舟不避風不可渡也非唯下流衆川之多乎今若衣服甚盛顏色充盈天下誰肯加若者哉子路趨而出改服而入蓋自如也孔子曰由記之吾語若貴于言者華也奮于行者的伐也夫色智而行能者小人也故君子知之為知之不知為不知言之要也能之為能不能為不能行之至也言要則知行要則仁既知且仁夫有何加矣哉由詩云湯降不遲聖敬日躋此之謂也

公孟子高見顓孫子莫曰敢問君子之禮何如顓孫子
莫曰去爾外厲與爾內色勝而心自取之去三者而可
矣公孟子不知以告曾子曾子愀然逡巡曰大哉言乎
夫外厲者必內折色勝而心自取之者必為人役是故
君子德行成而容不知聞識博而辭不爭知慮微達而
能不愚

劉向敬慎篇 高上尊賢無以驕人聰明聖智無以窮
人資急疾速無以先人剛毅勇猛無以勝人不知則問

不能則學雖智必質然後辯之雖能必讓然後為之故
士雖聰明聖智自守以愚功被天下自守以讓勇力距
世自守以怯富有天下自守以廉此所謂高而不危滿
而不溢者也

晉王坦之與韓康子論公謙之義曰天道以無私成名
二儀以至公立德立德存乎至公故無親而非禮成名
在乎無私故在當而忘我此天地所以成功聖人所以
濟化由斯論之公道體于自然故理泰而愈降謙義生

于不足故時弊而義著故大禹咎繇稱功言惠而成功
于彼孟反范燮殿軍後入而全身于此從此觀之則謙
公之義固以殊矣夫物之所美已不可收人之所貴我
不可取誠患人惡其上人不可蓋君子居之而每加損
焉隆名在于矯伐而不在于期當匿跡在于違顯而不
在于求是於是謙光之義與矜競而俱生卑挹之義與
夸伐而並進由親譽生于不足未若不知之有餘良藥
效于瘳疾未若無病之為貴也夫乾道確然示人易矣

坤道隤然示人簡矣二象顯于萬物兩德彰于羣生豈
矯枉過直而失其所哉由此觀之則大通之道公坦于
天地謙伐之義險巇于人事今存公而廢謙則自伐者
託至公以生嫌自美者因存黨以致惑此王生所謂同
貌而實異不可不察者也然理必有源教亦有主苟探
其根則玄指自顯若尋其末弊無不至豈可以嫌似而
疑至公弊貪而忘于諒哉康子及袁宏並有疑難坦之
標章槩句一一申而釋之莫不厭服

坦之既著公謙論袁宏作論以難之韓伯覽而美其詞旨以為是非既辯誰與正之遂作辨謙以折中曰夫尋理辨疑必先定其名分所存所存既明則彼我之趣可得而詳也夫謙之為義存乎降已者也以高從卑以賢同鄙故謙名生焉孤寡不穀人之所惡而侯王以自稱降其貴者也執御執射衆之所賤而君子以自目降其賢者也與夫山在地中之象其致豈殊哉捨此二者而更求其義雖

南轅求冥終莫近也夫有所貴故有降焉夫有所
美故有謙焉譬影響之與形聲相與而立道足者
忘貴賤而一賢愚體公者乘理當而均彼我降挹
之義於何而生則謙之為美固不可以語至足之
道涉乎大方之家矣然君子之行已必尚於至當
而必造乎匿善至理在乎無私而動之於降已者
何誠由未能一觀於能鄙則貴賤之情立非忘懷
于彼我則私己之累存當其所貴在我則矜值其

所賢能之則伐處貴非矜而矜己者常有其貴言
善非伐而伐善者驟稱其能是以知矜貴之傷德
者故宅心于卑素悟驟稱之虧理者故情存乎不
言情存于不言則善斯匿矣宅心于卑素則貴斯
降矣夫所况君子之流苟理有未盡情有未夷存
我之理未冥于內豈不同心于降挹洗之所滯哉
體有而擬無者聖人之德有累而存理者君子之
情雖所滯不同其於遣之緣有弊而用降己之道

由私我而存一也故懲忿窒慾著于損象卑以自牧
實繫謙爻皆所以存其所以不足拂其所有餘者也王
生之談以至理無謙近得之矣云人有爭心善不可
收假後物之迹以逃動者之患以語聖賢則可施之
于下斯者豈惟逃患于外亦所以洗心于內也

唐渭南尉劉延祐弱冠登進士第政事為畿縣最李勣
謂之曰足下春秋甫爾遽擅大名宜稍自損抑無為
獨出人右也

慎
十六則

呂覽慎小篇 上尊下卑卑則不得以小觀上尊則恣
恣則輕小物輕小物則上無道知下下無道知上上下
不相知則上非下下怨上矣人臣之情不能為所怨人
之情不能愛所非此上下大相失道也故賢主謹小物
以論好惡巨防容螻而漂邑殺人突洩一煙而焚宮燒
積將失一令而軍破身死主過一言而國殘名辱為後
世笑衛獻公戒孫林父甯殖食鴻集于囿虞人以告公

如圍射鴻二子待君日晏公不來至來不釋皮冠而見
二子二子不說遂獻公立公子黜衛莊公立欲逐石圃
登臺以望見戎州而問之曰是何為者也侍者曰戎州
也莊公曰我姬姓也戎人安敢居國使奪之宅殘其州
晉人適攻衛戎州人因與石圃殺莊公立公子起此小
物不審也人之情不蹙於山而蹙於堙齊桓公即位三
年三言而天下稱賢羣臣皆說去肉食之獸去食粟之
鳥去絲且之網

申子曰上明見人備之其不明見人惑之其知見人飾之不知見人匿之其無欲見人伺之其欲有見人餌之故曰吾無從知之惟無為可以規之慎而言也人且知女慎而行也人且隨女而有知見也人且匿女而無知見也人且意女女有知也人且臧女女無知也人且行女故曰惟無為可以規之

田子方問周易鞫曰弋者何慎對曰烏以數百目視子子以二目御之子謹周子廩田子方曰善子加之弋我

加之國鄭長者聞之曰子方知欲為廩而未得所以為
廩夫虛無見者廩也齊宣王問弋於唐易子曰弋者奚
貴唐易子曰在於謹廩王曰何謂謹廩對曰鳥以數十
目視人人以二目視鳥奈何其不謹廩也故曰在於謹
廩也然則為天下何以為此廩今人主以二目視一國
一國以萬目視人主將何以不自為廩乎聞之鄭長者
有言曰夫虛靜無為而無見也其可以為此廩乎

堂谿公謂昭侯曰今有千金之玉卮通而無當可以盛

水乎昭侯曰不可有瓦器而不漏可以盛酒乎昭侯曰可對曰夫瓦器至賤也不漏可以盛酒雖有千金之玉卮至貴而無當漏不可盛水則人孰注漿哉今為人主而漏其羣臣之語是猶無當之玉卮也雖有聖智莫盡其術為其漏也昭侯曰然昭侯聞堂谿公之言自此之後欲發天下之大事未嘗不獨寢恐夢言而使人知其謀也堂谿公見昭侯曰今有白玉之卮而無當有瓦卮而有當君渴將何以飲君曰以瓦卮堂谿公曰白玉之

卮美而君不以飲者以其無當耶君曰然堂谿公曰為人主而漏泄其羣臣之語譬猶玉卮之無當堂谿公每見而出昭侯必獨卧惟恐夢言泄於妻妾申子曰獨視者謂明獨聽者謂聰能獨斷者可以為天下王

吳章謂韓宣王曰人主不可佯愛人一日不可復憎不可以佯憎人一日不可復愛也故佯憎佯愛之徵見則諛者因資而毀譽之雖有明主不能復收而况於以誠借人也

靖郭君相齊與故人久語則故人富懷左右則左右重久語懷刷小資也猶以成富况於吏勢乎

漢武帝時大將軍衛青出定襄斬首數千級而還月餘復出定襄擊匈奴斬首虜萬人右將軍蘇建前將軍趙信并軍三千餘騎獨逢單于兵與戰一日餘漢兵且盡前將軍故胡人遂犇降單于右將軍建獨以身得亡去自歸大將軍大將問其罪正閔長史安議郎周霸等建當云何霸曰自大將軍出未嘗斬裨將今建棄軍可斬

以明將軍之威閔安曰不然兵法小敵之堅大敵之禽也今建以數千當單于數萬力歸一日餘士盡不敢有二心自歸自歸而斬之是示後無反意也不當斬大將軍曰青幸得以肺腑待罪行間不患無威而霸說我以明威甚失臣意且使臣職雖當斬將以臣之尊寵而不敢自擅專誅于境外而具歸天子天子自裁之於是以見為人臣不敢專權不亦可乎軍吏皆曰善遂囚建詣行在所

張安世職典樞機以謹慎周密自著外內無間每定大政已決輒移病出聞有詔令乃驚使吏之丞相府問焉自朝廷大臣莫知其與議也嘗有所薦其人來謝安世大恨以為舉賢達能豈有私謝邪絕弗復為通有郎功高不調自言安世應曰君之功高明主所知人臣執事何短長而自言乎絕不許已而郎果遷莫府長史遷辭去之官安世問以過失長史曰將軍為明主股肱而士無所進論者以為譏安世曰明主在上賢不肖較然臣

下自修而已何知士而薦之其欲匿名迹遠權勢如此
孔光領尚書典樞機十餘年守法度修故事成帝有所
問據經法以心所安而對不希旨苟合如或不從不敢
強諫諍以是久而安時有所言輒削草藁以為章主之
過以奸忠直人臣大罪也有所薦舉惟恐人之聞知沐
日歸休兄弟妻子燕語終不及朝省政事或問光溫室
省中樹皆何木也光嘿然不應更以他語其不泄如是
樊宏謙柔過慎不求苟進常戒其子曰富貴盈溢未有

能終者吾非不喜榮執也天道惡盈而好謙前世貴戚
皆明戒也保身全己豈不樂哉每當朝會輒迎期先到
俯伏待事時至乃起光武帝聞之常勅騶騎臨朝乃告
勿令豫到宏所上便宜及言得失輒手自書寫毀削草
本公朝訪逮不敢衆對宗族染其化未嘗犯法帝甚重
之

晉羊祜歷職二朝任典樞要政事損益皆諮訪焉勢利
之求無所關與其嘉謀讜議皆焚其草故世莫聞凡所

進達人皆不知所由或謂祐慎密太過者祐曰是何言歟夫入則造膝出則詭辭君臣不密之誠吾惟懼其不及不能舉賢取異豈得不愧知人之難哉且拜爵公朝謝恩私門吾所不取祐女夫嘗勸祐有所營置令所歸戴者可不美乎祐默然不應退告諸子曰此可謂知其一不知其二人臣樹私則背公是大惑也汝宜識吾此意

荀勗性慎密每有詔令大事雖已宣布然終不言不欲

使人知己豫聞也族弟良曾勸勗曰公大失物情有所
進益者自可語之則懷恩多矣其壻武統亦說勗宜有
所營置今有歸戴者勗並默然不應退而語諸子曰人
臣不密則失身樹私則背公是大戒也汝等亦當宦達
人間宜識吾此意

劉超少有志尚為縣小吏稍遷琅邪國記室掾以忠謹
清慎為元帝所拔恒親侍左右遂從渡江轉安東府舍
人專掌文檄相府建又為舍人於時天下擾亂伐叛討

貳超自以職在近密而書迹與帝手筆相類乃絕不與人交書時出休沐閉門不道賓客由是漸得親密以左右勞勤賜爵原鄉亭侯食邑七百戶轉行參軍中興建為中書舍人拜騎都尉奉朝請時臺閣初建庶績未康超職典文翰而畏慎密彌見親待加以處身清苦衣不重帛家無儋石之儲每帝所賜皆固辭曰凡陋小臣橫竊賞賜無德而祿殃咎足懼帝嘉之不奪其志

傅亮演慎論 大道有言慎終如始則無敗事矣易曰

括囊無咎慎不害也又曰藉之用茅何咎之有慎之至也文王小心大雅詠其多福仲由好勇馮河貽其苦箴虞書著慎身之譽周廟銘陞坐之側因斯以談所以保身全德其莫尚於慎乎夫四道好謙三材忌滿祥萃虛室鬼瞰高屋豐屋有蔀家之災鼎食無百年之貴然而徇欲厚生者忽而不戒知進忘退者曾莫之懲前車已摧後鑿不息乘危以庶安行險而徼幸於是有顛墜覆亡之禍殘生天命之釁其故何哉流溺忘反而以身輕

於物也故昔之君子同名爵於香餌故傾危不及思憂
患而豫防則針石無用洪流墜於涓涓合拱挫於纖蘖
介焉是式色斯而舉悟高鳥以風逝鑑醴酒而投絃夫
豈敝著而後謀通患結而後思復云爾而已哉故詩曰
慎爾侯度用戒不虞言防萌也夫單以營內喪表張以
治外失中齊秦有守一之敗偏恃無兼濟之功冰炭滌
於胃心巖牆絕於四體夫然故形神偕全表裏寧一營
魄內澄百骸外固邪氣不能襲憂患不能及然可以語

至而言極矣夫以嵇子之抗心希古絕羈獨放五難之
根既拔立生之道無累人患殆乎盡矣徒以忽防於鍾

呂肆言於禹湯禍機發於毫端逸翩鍛於垂舉觀夫貽

書良友則匹厚味於甘醎

缺八字

其懼患

也若無轡而乘奔其慎禍也猶履冰而臨谷或振褐高
棲揭竿獨往或保約違豐安于卑位故漆園外楚忌在
龜犧商洛遐遊畏此駟馬平仲辭邑殷鑒于崔慶張臨
挹滿灼戒乎桑霍若君子覽茲二塗則賢鄙之分既明

全喪之實又顯非知之難慎之惟艱慎也者言行之樞
管乎夫據國揮必愚夫弗為臨淵登峭莫不惴慄何則
害交故慮篤患切而懼深詩曰不敢暴虎不敢馮河慎
微之謂也故庖子涉族怵然為戒差之一毫斃猶如此
况乎觸害犯機自投死地禍福之具內充外斥陵九折
於卣燹泛衝波于呂梁傾側成于俄頃性命哀而莫救
嗚呼嗚呼故語有之曰誠能慎之福之根也

宋呂公著疏 易曰君不密則失臣臣不密則失身幾

事不密則害成夫人主延見羣臣與之講天下之事
而論及人物之臧否此所宜謹密者也苟人主謹密
有所不至則人臣悼後害之及念失身之戒而不敢
盡其所言此易之所謂不密則失臣者也况人君用
人既用其長固欲知其短知而暴之則莫肯盡其心
力苟不能使人人盡其心力則其勢未可知也

王安石論孫覺令吏人寫章疏劄子 臣今日蒙宣

諭召以孫覺令吏人寫論列大臣章疏臣初亦怪其

不能謹密但疑此朋友所當誨責非人主所當譴怒既又反復思惟陛下以覺為可聽信故在諫官進賢退不肖自其職分所當論列雖揚言於朝以迪上心於義未為失也但令吏人書寫章疏誠不足以及譴怒凡人臣當謹密者以君子小人消長之勢未分言有漏洩或能致禍如其不密則害於其身若遭值明主危言正論無所忌憚亦何謹密之有乎惟有姦邪小人以枉為直懼為公論之所

不容則惟恐其言之不密若得此輩在位陛下何
所利乎若陛下疑覺有交黨之私招權之姦則恐
盛德之世不宜如此魏鄭公以為上下各存形迹
則國之廢興或未可知若陛下不考察邪正是非
而每事如此猜防則恐善人君子各顧形迹不敢
盡其忠讜之言而姦邪小人得伺人主之疑行讒
慝也若陛下恐陳升之聞此或不自安臣亦以為
不然漢高主猜雄之主也然鄂千秋明論相國蕭

何功次而高祖不疑乃更加賞亦不聞蕭何以此為嫌陛下聖賢高遠自漢以來令德之主皆未有能企及陛下者每事當以堯舜三代為法奈何心存末世褊吝之事乎書曰任賢勿貳去邪勿疑不明知其賢而任之以為賢不明見其邪而疑之以為邪非堯舜三代之道也陛下以臣為可信故聖問及之臣敢不盡愚今日口對未能詳悉故謹具劄子以聞

長厚 五則

漢文帝詔張釋之拜虎圈嗇夫為上林令釋之前曰夫絳侯東陽侯稱為長者此兩人言事曾不能出口豈數此嗇夫謀謀利口捷給哉且秦以任刀筆之吏吏爭以亟病苛察相高然其敝徒文具耳無惻隱之實以故不聞其過陵遲而至于二世天下土崩今陛下以嗇夫口辯而超遷之臣恐天下隨風靡靡爭為口辯而無實且下之化上疾於景響舉不可不審也文帝曰善

吳定威校尉陸遜言於孫權曰方今克敵寧亂非衆不濟而山寇舊惡依阻深地夫腹心未平難以圖遠可大部伍取其精銳權從之以為帳下右都督會丹陽賊帥費棧作亂扇動山越權命遜討棧破之遂部伍東三郡彊者為兵羸者補戶得精卒數萬人宿惡盪除所過肅清還屯蕪湖會稽太守淳于式表遜枉取民人愁擾所在遜後詣都言次稱式佳吏權曰式白君而君薦之何也遜對曰式意欲養民是以白遜若遜復毀式以亂聖

聽不可長也權曰此誠長者之事顧人不能為耳

唐婁師德寬厚清慎犯而不校與李昭德俱入朝師德體肥行緩昭德屢待之不至怒罵曰田舍夫師德徐笑曰師德不為田舍夫誰當為之其弟除代州刺史將行師德謂曰吾備位宰相汝復為州牧榮寵過盛人所疾也將何以自免弟長跪曰自今雖有人唾某面某拭之而已庶不為兄憂師德愀然曰此所以為吾憂也人唾汝面怒汝也汝拭之乃逆其意所以重其怒夫唾不拭

自乾當笑而受之在河隴前後四十餘年恭勤不息民
夷安之性沈厚寬恕狄仁傑之入相也師德實薦之而
仁傑不知意頗輕師德數擠之於外天后覺之嘗問仁
傑曰師德賢乎對曰為將能謹守邊陲賢則臣不知又
曰師德知人乎對曰臣嘗同僚未聞其知人也天后曰
朕之知卿乃師德所薦也亦可謂知人矣仁傑既出歎
曰婁公盛德我為其所包容久矣吾不得窺其際也是
時羅織紛紜師德久為將相獨能以功名終人以此重

之

宋真宗時寇準以三司使林特附會邪險惡之每事沮抑帝方寵特聞之不悅謂王旦曰準剛忿如昔旦曰準好人懷惠又欲人畏威皆大臣所當避而準乃以為已任此其所短也非至仁之主孰能容之準竟以是罷初準數短旦于帝而旦專稱準帝謂旦曰卿雖稱其美彼專談卿惡旦曰理固當然臣在相位久政事缺少必多準對陛下無隱益見其忠直此臣所以重準也帝由是

益賢旦中書有事送樞密院違詔格準以上聞旦被責
拜謝堂吏皆坐罰不踰月樞密有事送中書亦違詔格
堂吏欣然呈旦旦令送還樞密而已準大慙謝及罷準
托人語旦求為使相旦驚曰將相之任豈可求耶吾不
受私請也準深憾之已而除準武勝軍節度使同平章
事判河南府準入見謝曰非陛下知臣安能至此帝具
道旦所以薦者準愧歎以為不可及

御史吳中復請召還唐介文彥博因言于仁宗曰介頃

言臣事多中臣病其間雖有風聞之誤然當時責之太深請如中復奏乃召介知諫院時稱彥博長者

雅量七則附

漢蔣琬為大司馬東曹掾犍為楊戲素性簡略琬與言論時不應答或謂琬曰公與戲語而不應其慢甚矣琬曰人心不同各如其面從後言古人所誠戲欲贊吾是邪則非其本心欲反

吾言則顯吾之非是以默然是戲之快也又督
農楊敏嘗毀琬曰作事憤憤誠不及前人或以
白琬主者請推治敏琬曰吾實不如前人無可
推也主者乞問其憤憤之狀琬曰苟其不如則
事不理事不理則憤憤矣後敏坐事繫獄衆人
猶懼其必死琬心無適莫敏得免重罪

隋文安憲侯牛弘寬厚恭儉學術精博隋室舊
臣始終信任悔吝不及者唯弘一人而已弟弼

好酒而酗嘗因醉射殺弘駕車牛弘來還宅其妻迎謂之曰叔射殺牛弘無所怪問直答云作脯坐定其妻又曰叔忽射殺牛大是異事弘曰已知之矣顏色自若讀書不輟

唐高宗聞洺州刺史程名振善用兵召問方略嘉其才敏勞勉之名振失不拜謝上試責怒以觀其所為名振謝曰疎野之臣未嘗親奉聖問適方心思所對故忘拜耳舉止自若應對愈明

辨上乃嘆曰竒士也即日拜右驍衛將軍

天后謂狄仁傑曰卿在汝南甚有善政卿欲知
譖卿者名乎仁傑謝曰陛下以臣為過臣請改
之知臣無過臣之幸也不願知譖者名天后深
歎美之

裴行儉常命左右取犀角麝香而失之又敕賜
馬及鞍令史輒馳驟馬倒鞍破二人皆逃去行
儉使人召還謂曰爾曹皆誤耳何相輕之甚邪

待之如故破阿史那都支得馬腦盤廣二尺
餘以示將士軍吏王休烈捧盤升階跌而碎
之惶恐叩頭流血行儉笑曰爾非故為何至
於是不復有追惜之色詔賜都支等資產金
器三千餘物雜畜稱是並分給親故及偏裨
數日而盡

敬宗以裴度為司空同平章事度在中書左右
忽白失印聞者失色度飲酒自如頃之左右白

復於故處得印度不應或問其故度曰此必吏人盜之以印書券耳急之則投諸水火緩之則復還故處人服其識量

宋呂蒙正初入朝堂有朝士指之曰此子亦參政耶蒙正佯為不聞而過之同列不能平詰其姓名蒙正遽止之曰若一知其姓名則終身不能忘不若弗知之為愈時人服其量

忍辱二則附

趙簡子以襄子為後董安于曰無恤不才今
以為後何也簡子曰是其人能為社稷忍辱
異日智伯與襄子飲而灌襄子之首大夫請
殺之襄子曰先君之立我也曰能為社稷忍
辱豈曰能刺人哉處十月智伯圍襄子于晉
陽襄子流隊而擊之大敗智伯漆其首以為
飲器

張耳陳餘俱魏之大梁人也張耳為外黃令

與陳餘兩人爲刎頸交秦之滅大梁也聞此
兩人魏之名士購求有得張耳千金陳餘五
百金張耳陳餘乃變姓名俱之陳爲里監門
以自食兩人相對里吏嘗有過笞陳餘陳餘
欲起張耳躡之使受笞吏去張耳乃引陳餘
之桑下而數之曰始吾與公言何如今見小辱
而欲死一吏乎陳餘然之秦詔書購求兩人兩
人亦反用門者令里中

反質 一則附

劉向反質篇 孔子卦得賁喟然仰而歎息意不平子
張進舉手而問曰師聞賁者吉卦而歎之乎孔子曰賁
非正色也是以嘆之吾思也質素白當正白黑當正黑
夫質又何也吾亦聞之丹漆不文白玉不雕寶珠不飾
何也質有餘者不受飾也至信鬼神者失謀信日者失
時何以知其然夫賢聖周知能不時日而事利敬法令
貴功勞不卜筮而身吉謹仁義順道理不禱祠而福致

卜數擇日潔齋戒肥犧牲飾珪璧精祠祀而終不能除悖逆之禍以神明有知而事之乃欲背道妄行而以祠祀求福神明必違之矣天子祭天地五嶽四瀆諸侯祭社稷大夫祭五祀士祭門戶庶人祭其先祖聖王承天心制禮分也凡古之卜日者將以輔道稽疑示有所先而不敢專自也非欲以顛倒之惡而幸安全之孔子曰非其鬼而祭之諂也是以泰山終不享季氏之旅易稱東隣殺牛不如西隣之禴祭蓋重禮不貴牲也敬實而

不貴華誠有其德而推之則安往而不可是以聖人見人之文必考其質歷山之田者善侵畔而舜耕焉雷澤之漁者善爭陂而舜漁焉東夷之陶器窳而舜陶焉故耕漁與陶非舜之事而舜為之以救敗也民之性皆不勝其欲去其實而歸之華是以若窳之器爭鬪之患起爭鬪之患起則所以偷也所以然者何也由離誠就詐棄樸而取偽也追逐其末而無所休止聖人抑其文而抗其質則天下反矣詩云尸鳩在桑其子七兮淑人君

子其儀一分傳曰尸鳩之所以養七子者一心也君子之所以理萬物者一儀也以一儀理物天心也五者不離合而為一謂之天心在我能因自深結其意于一故一心可以事百君百心不可以事一君是故誠不遠也夫誠者一也一者質也君子雖有外文必不離內質矣衛有五丈夫俱負缶而入井灌韭終日一區鄧析過下車為教之曰為機重其後輕其前命曰橋終日溉韭百區不倦五丈夫曰吾師言曰有機知之巧必有機知

之敗我非不知也不欲為也子其往矣我一心溉之不
知改已鄧析去行數十里顏色不悅憚自病弟子曰是
何人也而恨我君請為君殺之鄧析曰釋之是所謂真
人者也可令守國

質行

一則附

漢景帝以太子太傅石奮及四子皆二千石乃集其門
號奮為萬石君萬石君無文學而恭謹無與比子孫為
小吏來歸謁萬石君必朝服見之不名子孫有過失不

責讓為便坐對案不食然後諸子相責因長老肉袒謝罪改之乃許子孫勝冠者在側雖燕居必冠其執喪哀戚甚悼子孫遵教皆以孝謹聞乎郡國及趙綰王臧以文學獲罪竇太后以為儒者文多質少今萬石君家不言而躬行乃以其長子建為郎中令少子慶為內史建在上側事有可言屏人恣言極切至廷見如不能言者武帝以是親之慶嘗為太僕御出上問車中幾馬慶以策數馬畢舉手曰六馬慶於諸子中最為簡易矣

專一 一則

劉向雜言 麋鹿成羣虎豹避之飛鳥成列鷹鷂不擊
衆人成聚聖人不犯騰蛇遊于霧露乘于風雨而行非
千里不止然則暮託宿于鱖鱸之穴所以然者何也用
心不一也夫蚯蚓內無筋骨之強外無爪牙之利然下
飲黃泉上墜晞土所以然者何也用心一也聰者耳聞
明者目見聰明形則仁愛著廉恥分矣故非其道而行
之雖勞不至非其有而求之雖強不得智者不為非其

事廉者不求非其有是以遠容而名章也詩云不忮不求何用不臧此之謂也

持重

五則

晉桓溫既平洛陽議欲遷都朝廷憂懼將遣侍中止之王述曰溫欲以虛聲威朝廷非事實也但從之自無所至事果不行又議欲移洛陽鍾虞述曰永嘉不競暫都江左方當蕩平區宇旋軫舊京若其不耳宜改遷園陵不應先事鍾虞溫竟無以奪之

桓溫欲北伐屢詔不許溫輒下武昌人情震懼或勸殷
浩引身告退王彪之言于簡文曰此非為社稷計自為
計耳若殷浩去職人情崩駭天子獨坐既爾當有任其
責者非殿下而誰又謂浩曰彼抗表問罪卿為其首事
任如此猜釁已構欲作匹夫豈有全地耶且當靜以待
之令相王與手書示以款誠陳以成敗當必旋旆若不
順命即遣中詔如復不奉乃當以正義相裁無故息
息先是猖獗浩曰決大事正自難頃日來欲使人悶聞卿

此謀意始得了溫亦奉帝旨果不進

唐德宗時賈耽為山南東道節度使使行軍司馬樊澤奏事行在澤既復命方大宴有急牒至以澤代耽耽內牒懷中顏色不改宴罷召澤告之且命將吏謁澤牙將張獻甫怒曰行軍自圖節餞事人不忠請殺之耽曰天子所命則為節度使矣即日離鎮以獻甫自隨軍府遂安

文宗時李訓鄭注既誅召六道巡邊使田全操追忿訓

注之謀在道揚言我入城凡儒服者無貴賤當盡殺之全操等
乘驛疾驅入金光門京城訛言有寇至士民驚譟縱橫走塵埃
四起兩省諸司官聞之皆奔散有不及束帶鞭而來馬者鄭覃
李石在中書顧吏卒稍稍逃去覃謂石曰耳目頗異宜且出避
之石曰宰相位尊望重人心所屬不可輕也今事虛實未可知
坐鎮之庶幾可定若宰相亦走則中外亂矣且果有禍亂避亦
不免覃然之石坐視文案沛然自若敕使相繼傳呼閉皇城諸
司門左金吾大將軍陳君賞帥其衆立望仙門下謂敕使曰賊

至閉門未晚請徐觀其變不宜示弱至晡後乃定是日坊市惡少年皆衣緋皁執弓刀北望見皇城閉即欲剽掠非石與君賞鎮之京城幾再亂矣

郭子儀入朝魚朝恩邀之遊章敬寺元載恐其相結密使告子儀曰朝恩謀不利於公子儀不聽將士請東甲以從者三百人子儀曰我國之大臣彼無天子之命安敢害我若受命而來汝曹欲何為乃從家僮數人而往朝恩驚問其故子儀以所聞告且曰恐煩公經營耳朝恩撫膺流涕曰非公長者能無疑乎

陰德

四則

王忱字少林廣漢新都人也忱嘗詣京師于空舍中見一書生疾困憊而視之書生謂忱曰我當到洛陽而被病命在須臾腰下有金十斤願以相贈死後更藏骸骨未及問姓名而命絕忱即鬻一斤營其殯葬餘金悉置棺下人無知者後歸數年縣署忱大度亭長初到之日有馬馳入亭中而止其日大風飄一繡被復墮忱前即言之于縣縣以歸忱忱後乘馬到雒縣馬遂奔走牽忱

入他舍主人見之喜曰今禽盜矣問忱所由得馬忱具說其狀并及繡被主人悵然良久乃曰被隨旋風與馬俱亡卿何陰德而致此二物忱自念有葬書生事因說之并道書生形貌及埋金之處主人大驚號曰是我子也姓金名彥前往京師不知所在何意卿乃葬之大恩久不報天以此章卿德耳忱悉以被馬還之彥父不取又厚遺忱忱辭讓而去

虞翽字升卿陳國武平人也祖父經為郡縣獄吏案法

平允務存寬恕每冬月上其狀恒流涕隨之嘗稱曰東海于公高為里門而其子定國卒至丞相吾決獄六十年矣雖不及于公其庶幾乎子孫何不為九卿耶故字詡曰升卿

蘇軾三槐堂銘 天可必乎賢者不必貴仁者不必壽天不可必乎仁者必有後二者將安取衷哉吾聞之申包胥曰人衆者勝天天定亦能勝人世之論天者皆不待其定而求之故以天為茫茫善者以怠惡者以肆盜

跖之壽孔顏之厄此皆天之未定者也松柏生於山林其始也困於蓬蒿厄於牛羊而其終也貫四時閱千歲而不改者其天定也善惡之報至於子孫而其定也久矣吾以所見所聞所傳聞考之而其可必也審矣國之將興必有世德之臣厚施而不食其報然後其子孫能與守文太平之主共天下之福故兵部侍郎晉國王公顯於漢周之際厯事太祖太宗文武忠孝天下望以為相而公卒以直道不容於時蓋嘗手植三槐於庭曰吾

子孫必有為三公者已而其子魏國文正公相真宗皇帝於景德祥符之間朝廷清明天下無事之時享其福祿榮名者十有八年今夫寓物於人明日而取之有得有否而晉公修德於身責報於天取必於數十年之後如持左契交手相付吾是以知天之果可必也吾不及見魏公而見其子懿敏公以直諫事仁宗皇帝出入侍從將帥三十餘年位不滿其德天將復興王氏也歟何其子孫之多賢也世有以晉公比李栖筠者其雄才直

氣真不相上下而栖筠之子吉甫其孫德裕功名富貴
略與王氏等而忠信仁厚不及魏公父子由此觀之王
氏之福蓋未艾也懿敏公之子鞏與吾遊好德而文以
世其家吾是以錄之銘曰嗚呼休哉魏公之業與槐俱
萌封殖之勤必世乃成既相真宗四方砥平歸視其家
槐陰滿庭吾儕小人朝不及夕相時射利皇卹厥德庶
幾僥倖不種而獲不有君子其何能國王城之東晉公
所廬鬱鬱三槐惟德之符嗚呼休哉

石介陰德論 夫天辟乎上地辟乎下君辟乎中天地人異位而同治也天地之治曰禍福君之治曰刑賞其出一也皆隨其善惡而散布之善斯賞惡斯刑是謂順天地天地順而風雨和百穀嘉惡斯賞善斯刑是謂逆天地天地逆而陰陽乖四時悖三才之道不相離其應如影響禍福刑賞豈異出乎夫人不達天地君之治昧禍福刑賞之所出行君威命執君刑柄發仁布令代君誅賞而硜硜焉守小慈蹈小仁不肯去一姦人刑一有

罪皆曰存陰德其大旨謂不殺一人不傷一物則天地神明之所福也苟不以己之喜怒以天下之喜怒殺傷雖多天地神明福之矣苟不以天下之喜怒而以己之喜怒而害一人損一物天地神明固禍之矣且天地能覆載而不能明示禍福於人樹之以君假其刑賞以嚮背善惡人君能刑賞而不能親行黜陟於下任之以臣假其威權以進退貪良者進之君賞之也天福之也奚其德哉貪者退之君刑之也天禍之也奚其仇哉以

進退於人謂德仇在己乎欺天而無君也州方千里牧
非其人千里受弊邑方百里宰非其人百里受弊使一
牧一宰有罪而罹其誅孰多千里百里無其辜而受其
弊是仁一牧宰而不仁於千里也暴我鰥寡虐我惇嫠
天地君所欲除而存之違天地君也違天地君而曰存
陰德禍斯及矣白額虎暴而害物周處殺之而獲福兩
頭蛇見而人死叔敖斬之而得報尸而官塗而民其害
豈特白額虎兩頭蛇之比也而能除之陰德隆而無窮

矣

存孤

三則

漢李燮字德公初李固既策罷知不免禍乃遣三子歸鄉里時燮年十三姊文姬為同郡趙伯英妻賢而有智見二兄歸具知事本默然獨悲曰李氏滅矣自太公已來積德累仁何以遇此密與二兄謀豫藏匿燮託言還京師人咸信之有頃難作下郡收固三子二兄受害文姬乃告父門生王成曰君執義先公有古人之節今委

君以六尺之孤李氏存滅其在君矣成感其義乃將燹乘江東下入徐州界內令燹名姓為酒家傭而成賣卜于市各為異人陰相往來燹往從學酒家異之意非恒人以女妻燹燹專精經學十餘年間梁冀既誅而灾眚屢見明年史官上言宜有赦令又當存錄大臣寃死者子孫於是大赦天下并求固後嗣燹乃以本末告酒家酒家具車重厚遣之皆不受遂還鄉里追服姊弟相見悲感傍人既而戒燹曰先公正直為漢忠臣而遇朝廷


傾亂梁冀肆虐令吾宗祀血食將絕今弟幸而得濟豈
非天耶宜杜絕衆人勿妄往來慎無一言加于梁氏加
梁氏則連主上禍重至矣唯引咎而已燮謹從其誨後
王成卒燮以禮葬之感傷舊恩每四節為設上賓之位
而祠焉

朱暉字文季南陽宛人也同縣張堪素有名稱嘗于太
學見暉甚重之接以友道乃把暉臂曰欲以妻子託朱
生暉以堪先達舉手未敢對自後不復相見堪卒暉聞

其妻子貧困乃自往候視厚賑贍之暉少子頡怪而問之曰大人不與堪為友平生未嘗相聞子孫竊怪之暉曰堪嘗有知己之言吾以信于心也

晉庾袞撫諸孤以慈奉諸寡以仁事加于厚而教之義方使長者體其行幼者忘其孤孤甥郭秀比諸子姪衣食而每先之孤兄女曰芳將嫁美服既具袞乃刈荆條為箕箒召諸子集之于堂男女以班命芳曰芳乎汝少孤汝逸汝豫不汝疵瑕今汝適人將事舅姑灑掃庭內

婦人之道也故賜汝此篚器之為美欲溫恭朝夕雖休
勿休也而以舊宅與其長兄子賡俞及俞卒哀哀其早
孤痛其成人而未娶乃撫柩長號哀感行路聞者莫不
垂涕



經濟類編卷八十九